

DE ULCERIBUS
CUM CARIE
THESES
ANATOMICO-CHIRURGICÆ;

QUAS DEO JUVANTE & Præside M. PETRO-
MATHURINO BOTENTUIT LANGLOIS,
*Facultatis Artium & Chirurgiæ Magistro, in
utroque Jure Licentiatō, nec non in Scholâ Practicâ
Anatomes & Chirurgiæ nuper Professore, iuri
conabitur JACOBUS-LUDOVICUS-JOSEPHUS
MASURE, Parisinus, in almâ Universitate
Parisiensi Artium liberalium Magister, & in
Nosocomio Parisiensi dicto l'Hôtel-Dieu Chirurgus
internus, Theseos Auctor.*

Die Sabbati 5^a mensis Octobris, anno 1776, à sesqui-
secundâ postmeridiem ad septimam.

PRO ACTU PUBLICO
ET MAGISTERII LAUREA.



Typis MICHAELIS LAMBERT, Regii Chirurgiæ Collegii
Typographi, viâ Cithareâ.

M. DCC. LXXVI.



D. O. M.
T H E S E S
ANATOMICO - CHIRURGICÆ.

QUANTASCUNQUE vires adhibere Natura soleat, ut sanitatem tueatur, aut amissam restituat, quoties amico manûs industriosè medentis auxilio orbara, sibi non sufficit! Quodquidem cùm in omnibus, tùm præsertim in Chirurgicis morbis agnoscendum. Adsit calculus in vesicâ & ignoretur: quid tùm à Naturâ expectandum? Nihil profectò. Sed melioribus auspiciis advocetur Chirurgus: morbum perscrutatur, & mox veluti digito tangit, ac demùm penitùs extrahit; sicque, dolorum omnium sublatâ causâ, hominem ab ipsis orci faucibus eripit.

Hoc iridem porrò videtur in ulceribus cariosis, de quibus differendum nobis est, & quorum curatio, cùm de locali tantùm vitio agamus, à Chirurgiâ tantùm repetenda. His autem dicatam *Encheiresim* quis adstruet, nisi partium quæ morbi sedes sunt

structuram apprimè noverit? Liceat igitur cutis, textûs cellularis, ac deindè ossium descriptionem, levitè tantùm, brevitatis causâ perstringere.

EX ANATOMIA.

Externum totius corporis involucrum, inæqualitèr densum crassumque, extensionis & contractionis capax, cutis nomine venit.

Quadruplici partium serie conflatur.

Prima & interior, corium dicta, cæteris crassior, fibrarum miro ordine intertexta, vasis nervisque copiosa, cellularis textûs lamellis sibi invicem applicatis constat.

È corio prodeunt ac veluti emergunt papillæ ab expansione nervorum oriundæ, ordine, situ, numero, figurâ, pro variis partibus diversæ.

Inferuntur illæ papillæ corpori reticulari quod est veluti lamella quædam mucosa, mollis, diffuens, concreescens calore, epidermidique tenaciùs adhærens. Ex illo corpore reticulari oritur color cutis ac proindè Æthiopum nigrities: papillas sustinet, ordinat, irrorat & emollit.

Has omnes prædictas partes tegit & involvit epidermis seu cuticula, membrana omnium exterior, sicca, pellucida, diversè sulcata, tenuissima ut plurimùm, sed quibusdam locis seu attritu duriori, seu innatâ partium dispositione crassior: innumeris pertusa foraminulis, insensibili transpirationi, sudori, inhalationi facilem viam aperit: ad id inservit ut à durioribus sensationibus deffendantur nervi, quod patet ablatâ epidermide & papillis denudatis: ulterius verò ejus structuram curiosè indaganti neque fibræ, neque vasa, neque nervi occurrunt, sed tantùm squammulæ aliæ super alias positæ.

In cute insuper animadvertuntur glandulæ sebaceæ, ungues, & pili: sed hæc omnia minimè ad nostrum hoc propositum attinent.

Textum cellularem dicimus folliculorum membranaceorum congeriem ita intricatam, ut nascantur cellulæ magnitudine figuræque diversæ, omnes invicem perviæ, quas innumera perreptant

vasa. Non infra cutem tantùm deprehenditur, sed musculos etiam & vel minimos fibrarum fasciculos involvit: imò interiora pervadit organa, & omnia veluti penetrat; undè meritò dici possit spongia quædam in quam introductæ fuerint omnes aliæ corporis partes fibrillæque tenuissimæ, cuique super injecta fuerit cutis.

In hisce cellulis fecernitur ac deponitur humor oleosus morâ & frigore concreescens, adipis, sebi, medullæque nomine pro sede aut variâ densitate gaudens: modò rator, modò copiosior pro diverso partium usu, pro ætate, sexu, statu corporis ac temperamento: per textûs cellularis areolas lentè circumagitur, & facilè variis temporibus aut redundat aut resorbetur. Musculorum flexioni servandæ, lubricandis partibus, inungendis fibris, ac etiam nutritioni quibusdam videtur idoneus.

Ossa, solidiores firmioresque corporis humani partes, totius ædificii veluti fulcrum, triplici substantiâ gaudent, nempè compactâ, cellulari, & reticulari.

Compacta exterior, durior, albicans, variis lamellarum stratis conflatur aliis super alia positis, quorum tamen interiora veluti corrugata plicataque à cæteris paulatim divergunt, ita ut crassior sit stratorum compages in osse medio, versus extrema, imminuto lamellarum numero, tenuior.

Ex his lamellis à rectâ stratorum normâ declinantibus, & sese invicem decussantibus, nascitur cellularis substantia in ossium longorum capitibus cæterorumque corpore conspicienda.

Fibrillæ pariter osseæ, ex iisdem lamellis interioribus ortæ, quaquaversum positæ, sese diversè interfecantes, & in magnis tantùm ossium longorum cavitatibus conspicuæ, retis cujusdam speciem referunt: undè substantia reticularis fuit nuncupata.

Ossa irrorat & inungit humor oleosus ab extremis arteriis exsudans: vocatur in medijs ossibus longis medulla concreta; in capitibus verò & alibi, succus medullaris.

Teguntur demùm & involvuntur ossa periosteo, membranâ subalbidâ, densâ, vasis nervisque præditâ, inæqualiter spissâ, secundum ossis axim faciliùs evellendâ. Ejus ope sustinentur & ad os usque deducuntur vasa quæ nutritionis medullæque secre-

tionis materiam vehunt , sanguinemque residuum referunt. Majori copiâ in infantibus , minori in adultis reperiuntur : in senibus verò obliterantur pleraque , & rarissima apparent.

EX CHIRURGIA.

Ulcus cariosum est solutio continuitatis in parte molli cum effluxu puris & ossis erosione.

Dividi potest in benignum & malignum : benignum dicitur , cum levis est caries , cum à causâ externâ producitur , cum aggreditur os in quo operationes necessariae sine periculo celebrari possunt , cum denique curationi favent ætas & temperamentum ægri : malignum verò , ubi caries altissimè progreditur , ubi vitio interno fovetur & alitur , ubi spongiosa depascitur ossa , ubi situs mali , ægri debilitas , graviora demùm accidentia morbum exasperant.

Causæ sunt vel internæ , ut varia sanguinis vitia , varique medullæ & ossium indè exsurgentes morbi ; vel externæ , ut ictus , lapsus , & subsequens commotio , abcessus profundi , puris acrimonia , aeris contactus , ultio , frigus immodicum , ac denique omnes substantiæ quibus os erodi potest.

Diagnostica ulceris cariosi signa facillimè sæpè sæpius deprehenduntur : pluriès tamen sagacissimam Chirurgi perspicaciam requirunt. Si , verbi gratiâ , os oculis subjiciatur , tùm videtur periosteo denudatum , fuscum , nigrum , pingue , exasperatum , erosum. Si saltèm aut digito aut specillo tangi possit , tùm scabrum asperumque persentitur : sin autem oculos pariter tactumque fugiat , tùm ad certa minùs signa recurrendum , nempè puris oleosi & nigrescentis aut potius saniei effluxum , fuscata linamenta , fœtorem rancidum , carnis flaccidæ , mollis , spongiosæ redundantiam , quandoque squammulas & frustula ossium cum pure erumpentia , ac demùm ulceris iterùm atque iterùm recrudescentis pertinaciam.

A causâ , situ , gravitate morbi ac variis demùm circumstantiis prognosis instituenda. Si erosio levis & ab externâ causâ sub oculis

versetur, si æger ætate & temperamento vigeat, si mali situs varias operationes celebrandas admittat, tum certior speranda salus. Contrà autem ubi malum in obscuro serpit, ubi capita ossium aggreditur & ad articulos pervenit, ubi gravis & interna causa, debilis ægri constitutio, ætas in senectutem vergens, &c. tùm periculosissima caries pronuntietur.

Ulcus cariosum glutinari non potest, quia nulla permanent cicatrix ossi vitiato inducitur: in eo igitur consistit ejus curatio ut grassantis erosione progressus inhiuantur, & pars mortua per exfoliationem extrudatur: deindè ulcus veluti simplex habebitur.

Si fistulosa tantùm & angusta pateat apertura, aut scalpello aut causticis pars detegatur, si verò luxurianti spongiosæ carnis excrescentiâ obtegatur os erosum, sedulò omnes isti fungi radicibus evellantur, ut caries tanta quanta sit, oculis pateat obnoxia. Tùm viribus ægri consulendum, & natura mali apprimè dignoscenda, hinc enim quænam remedia sint usurpanda statuitur.

Si levis sit caries, plerumque sufficiet linamentum carptum aut siccum aut spirituoso medicamento imbutum. Si profundior, admovebuntur, deterfâ sanie, pulvis myrrhæ, aloes, euphorbii, olea ligni sancti, thymi, cinnamomi, aut potiùs hydrargirum spiritu nitri solutum ope penicilli illinendum aut instillandum usque dum ad sanam ossis partem perveniat, quod agnoscitur ubi nulla jam sanies ex ossis vitiati poris exit.

Intereà attentè videbitur num puris aliquod receptaculum tùm in ossis cavo, tùm in ejus cellulis, tùm etiam in confiniis lateat. Tunc enim ipsa puris ibi stagnantis acrimonia morbum latius latiusque protrahit: faciliè autem dignoscetur, si apparatu renovato puris hinc aut indè ex improvise erumpentis copiâ veluti inundatur fasciatio: quo in casu caries ulteriùs detegenda ut ad remotas puris latebras perveniatur, facilisque ipsi pateat exitus.

Quantacumque prædictis habeatur fiducia, si caries atrociter sæviens omnibus Chirurgi conatibus resistat indocilis, tunc ad heroicum, ut ita dicam, remedium, veluti unicam salutis anchoram, ignem scilicet deveniendum est. Ubi altissimas radices egit caries, os undique denudatum primò hinc indè modiolis terebra-

tum, aut radulâ rasum, aut scalpro & malleolo excisum, deinde ferro candente aduratur. At operator quam solertissimè præcaveat ne ignis contactu lædantur vitandæ partes. Centrum ergò cariei initio, dein margines tentabuntur : leniter primò, post firmiùs inuretur ferrum, & sic deinceps, dum sufficiens ossis adustio possit judicari.

Quoad verò exfoliationem ipsam, hîc natura plus arte valet. Pender enim ab inflammatione in sanâ ossis parte excitatâ : ibi tum ingurgitantur & extenduntur vasa ; ipforum oscillationes & vibrationes fibrarum increbrescunt : fit suppuratio laudabilis ; & quo in gangrænâ humidâ escharæ separantur, eodem, in carie, mechanismo exfoliantur ossa.

Ubi absolutè perfectum fuit illud opus ; & os operitur vasculosâ lamellâ quæ sanæ & rubicundæ carnis speciem refert, brevî & facili negotio vel simplicissimo quoque medicamento curatur ulcus ; cùm jam ipsius fundus firmam cicatrici mox generandæ basim præbeat. Sin autem caries articulos invaserit, & ossium capita penitus erodat, tum unica salutis spes in amputatione affulget, & unius membri jacturâ toti corpori consulendum.

F I N I S.